

Pilipi

Galagât den.

1 ¹Galalupnetje, net Paulo akto Timoteo net Yesu Kristogât honj bawa manmâ gaet. Netje Pilipi kepia Yesu Kristogât kâmot ye akto yengât damunlupyene yengât kulem ire kat yengiweraâm kulemgoet. Kulemgom katetje mem oyanmâ nângâm hejngemgowe.

²Ewenenje Anutu akto Humonenje Yesu Kristo yâkje damunyeje akmâ okot âlep akyengimbela biwiyene sândugeâkgât ulilaŋmaet.

Pauloje Pilipi yengât akmâ Anutu ulilaŋep.

³Nâ yengât Anutu ulilaŋberâm âmâ Anutuje wan me wan akyengimbo manman âlepje akmâ manmai aregât Anutu âlepnerâm mepaimje meman. ⁴Nâje ye hârokgât hokboâk hokboâk ulilaŋman âmâ ainâk yengât pat nângâm arekneak biwinân miawakto herone akman. ⁵Akto yeje nâ den pat âlepje makyengim manmangât hokboâk hokboâk tân nugum gambiâ huragumap aregât herone akman. Akto Anutuje wan akyengiep aregât mepai anmâ herone akmâ ulilaŋman. ⁶Akto areâk bo. Anutuje yengâlân âi keije kalepgât mem metembo Yesu Kristone purik katmâ miawakbiapgât sopje miawakto ain ye huraguwaigât nângân. Amâ Anutuje ye huragum kinbaigât dâp nângâm.

⁷Galalupne, nâ ye hain nângâ yengiman aregât nângâre huragumap. Akto Anutuje nekto ârândân akmap. Amâ hingât. Nâ den pat âlepje makyengire siânbaŋe den aregât hâkân akmâ kala busi kâlegen katnegi. Akto den pat âlepje bunjerâm siânbaŋe makbiâ den pat âlepje are gewop dâm âi humo mem malân. Aregât Anutuje nâ tân nugumap yâkje ye hainâk tân yengumap aregât nâ yengât okot âlep nângân.

⁸Galalupne, ire maktere Anutuje ekto bunje aktâp. Yesu Kristone okot âlep akyengimap dop hainâk nâkai ye okot âlep akyengiman. ⁹Are hainâk humo akmâ âgâwiapgât ulilaŋdân. Hingât ulilaŋdân. Wan me wan bâleje me âlepje are oyanmâ potatmâ âmâ okotyene dondâ nângâ aŋgiwaigât ulilaŋdân. ¹⁰Ye hain akbai âmâ benje yeje wan me wan bunje dondâ potatmâ hejngemgowai âmâ Kristo miawakbiap sop ain ye

biwi salek salek dosa bâlâk manbai. ¹¹ Akto Yesu Kristoŋe tân yeŋgumbo wan me wan bunŋe ârândân unsambe olowâk mem manbai. Hain akbiâ bikŋande yekmâ Anutugât kotŋe mem agatbiâ kot akto pagalenŋe humo talaŋmâ âgâwiâp.

Bikŋande ewangi gowangiân den pat âlepŋe makyenŋiyi.

¹² Galalupne, pâpkowâigât nune keine makyenŋire nânŋâŋet. Nâ den pat âlepŋe maktere aregât kala busi kâlegen katnegi are nânŋâmbiâ biwiyeŋe bo bâliwiâp. Bo. Iren nâ siâ siâ miawakniŋep are âmâ pat âlepŋaet dâp miawakmâ heŋgemgowiap dâm aregât miawagep. ¹³ Amâ hin. Nâ Kristogât âi mendere aregât kala busi kâlegen katnegi. Den pat are tembe loko in mandâi arekŋe hârokŋe nânŋâyi. Haminân kepia hârok nânŋâyi. ¹⁴ Akto kala busi kâlegen katnegi aregât galalupne bikŋande ulikŋân hamewâk mali arekŋe Humogât nânŋâm owâi aŋmâ Anutugât den pat hamep bâlâk makyenŋim mandâi.

¹⁵ Akto hinŋe kâmot lâuwâ miawaktâp amâ hin. Luâk bikŋande Kristogât pat makberâm âmâ nânŋât nânŋâmbiâ gemap akto ewangiak gowangiak kakŋân makmai. ¹⁶⁻¹⁷ Hain akmâ nâ yu kala busi kâlegen mandân ire hâk hilâlâm kakŋânâk niŋberâm hianŋim Kristogât kot makmâ sambelem yeŋaet nânŋâmbiâ humo akmap. Hain akmâ kotyeŋe mem agatberâm akto Yesugât kâmot potalakŋetgât Kristogât den makmai. Dâ bikŋande âmâ hain bo akmai. Arekŋe âmâ nâ den pat âlepŋe yaigoman aregât kala busi kâlegen katnegi are nânŋâm han okot âlep akniŋmâ den pat âlepŋe makmai. ¹⁸ Are nânŋâm âmâ hanâk Yesugât keiŋe biwiyeŋande bunŋe bo makyenŋimai, me biwiyeŋe kau kau akmâ makmai amâ âlepŋe nânŋân. Kristogât pat makbiâ sambelem ariâkŋât makmai aregât nânŋâm mandere biwine âlepŋe akmap.

Paulo manmangât me momogât ukenŋe konogâk nânŋâep.

¹⁹ Akto areâk bo. Pilipi ye âkâ nânŋât akmâ Anutu ulilaŋmâ manbiâ Yesu Kristogât Heakŋande tân nugumbo siâ siâ miawakniŋep arekŋe kârikŋe niŋmap aregât bunŋe heroŋe humo miawakniŋmâ âgâwiap. ²⁰ Akto aŋun bo aŋgiwian are nânŋâre kârigembo hannande nânŋaŋmâ manbian. Akmâ gan hain âgâk akbian. Manmangât akto momogât hâkne owâiŋe âgâk Kristo kotgâm waŋdere arekŋe egâliaŋ âlepŋe akbiâp. ²¹ Aregât lâuwâŋe makbe. Hânân manman amâ Kristogât akmâ manman. Dâ hinŋe mombian amâ hainâk wan me wan âlepŋe dondâŋe miawakniŋbiap. ²² Dâ hânân dewatim manbianân âmâ âigât bunŋe gaetŋe mem miawakbian. Dâ aregât âmâ wan arekŋaetgât owâiwe dâm makmâ han lâuwâ aktân. ²³ Nâ siâ me siâ miawakniŋdo han lâuwâ akman aregât biwine umatŋe aktâp. Hinŋe mom âmâ Kristo olop manmâ âgâwian. Aregât nânŋâm ukenŋe aktân. ²⁴ Dâ ye mându akbâi gârâmâ

yengât akmâ hânân gaetŋe dewatim mandere ârândân akbiap. ²⁵Aregât hin nânġân. Anutuŋe makto nâ ye olop manmâ tân yengure nânġâ nânġâyeŋe humo akto biwiyenŋe Yesugâlân katbiâ kindo heronŋe akbai. ²⁶Akto nânŋe hinŋe togom tân yenguwian aregât Yesu Kristogât akmâ nânġâniŋmâ heronŋe akbai.

Tân agu agu akmâ manbaen.

²⁷Galalupne, den umatŋe ire makyenġire nânġâŋet. Nâ togom yekbian me kâlêwângen manmâ yengât pat âlepŋe nânġâwian aregât hin akbei. Ye Kristogât pat bâliwopgât agak meme âlepŋe areâk mem manmâ âġâwei. Hain manmâ biwi konok akmâ tân agum den pat âlepŋe makmâ hâk hilâlâm olowâk hanâk manmâ âġâwei. Akto gasalupyenande mem ge katyekberâmbiâ âmâ hanâk hamep bâlâk âi mem manmâ âġâwai. ²⁸Tân agu agu akbiâ gasalupyenande hamep meyenġimbiâ kârikŋeyenŋe bo yeugewiâp. Hain akto Anutuŋe yâk hepunyekbiap dâ ye meyekbiapgât keiŋe mem miawaktâp. ²⁹Aregât lâuwânŋe makbe. Anutuŋe ye biwiyenŋe Kristogâlân kali areâk bo nânġâ yengimap. Amâ Anutuŋe ye biwiyenŋe yâġgâlân kali akto yâġgât akmâ hâk hilâlâm kakŋân manŋetgât hârok Anutuŋe nânġâ yengimap. ³⁰Nânġâ yengimbo ye hainâk akmâ nânŋe hâk hilâlâm kakŋân âi meân are egi. Dâ hinŋe mandere aregât pat nânġâi are amâ manman âi areâk yeŋe hainâk mandâi. Anutuŋe ye hain akbaigât magep gârâmâ gasalupyenŋe yengât hamep bo akbei.

Yesuŋe ulikŋân aknengiepgât nenâkâ areâk akbaen.

2 ¹Galalupne, Kristonŋe tân yengumbo biwiyenŋe sândugemap aregât akto Kristonŋe okot akyenġimbo heronŋe akmai aregât akto Anutugât Heakŋande tân yengumbo okot âlep aganġim han kalemŋe miawakyenġimap ²aregât nânġâ nânġâ konok katbei. Akto hanyenande konok tânaguwei. Akto gala konok manbei. Hain akbiâ âmâ okot âlep nânġâm heronŋe humo nânġâwian. ³Akto areâk bo. Yeŋaet nânġâ anġimbiâ bo agatbiâp. Bo. Hin akbei. Yeŋaet nânġâ anġimbiâ gembo âmâ galalupyenŋe yengât nânġâ yengimbiâ âġâwiap. ⁴Akto siânŋe ikiŋaelâk siâ siâ akmâ heŋgemgowiap akto areġâlâk bo. Galalupyenŋe yengât nânġâm wan me wan bâlim yendo heŋgemgowe. Ye hârok hain akbei. ⁵Yesu Kristo hânân manmâ gain gain agep? Ye han hainâk nânġâwei. ⁶Yâk âmâ ikiŋaet nânġâmbo bo âġâep. Yâk âmâ Anutuŋe manmap dop hainâk manmap. Akto Anutugât dop bo gangerâep. ⁷Bo. Yâk ikiŋe manmanŋe hepunmâ âmâ Anutu olop dop konok malep are hepunmâ hoŋ luâk hainare akmâ malep. ⁸Yâġgât gegeŋe akmâ manmâ Anutugât lau lokom âmâ moep. Akto lâwinân momberâm aregât hamep bo akmâ moep. ⁹Akto Yesuŋe hain agepgât Anutuŋe mem agatmâ kotŋe humo kondo are nânġâenŋe humo akmâ kot patnenŋe ewangiâp. ¹⁰Akto Anutuŋe hânân manden me himbimân mandâi me hân

amukñân mandâi nen hârok Yesugât kotje mem agatbaengât kotje konlep. Aregât nen hârok Yesugât kotje mem agatmâ pâwut ligianbaen. ¹¹Akto nen hârok Yesu Kristo âmâ Humonenje Anutuje huŋgun aŋdo giep dâenne Ewenenje Anutugât kotje âgâwiap.

Henggem agum mannegât kârikje akniâm.

¹²Galalupne, Ye âkâ nâ ulikñân ye olop malângât laune lokomini. Dâ hinje ye olop mandereânâk bo. Akñângen mandere patne nâŋgâm laune hârok lokowei. Aregât akmâ hengemgo yejaet bunje peneyenjiâkgât hanokoagâk akmâ kaut orewei. ¹³Imâ yengât dop bo. Anutuje yekto âlepje âgâkgât ukenjaet akmâ tân yengumap arekje yeje laune lokojetdâm kârikje yengimbo biwiyeje owâiŋe akmap.

¹⁴Akto ye dosa me konam bâlâk manbiâ Anutuje yekto huraguwiapgât siâ siâ akberâm den kakñân bo hogoanjim hâkâŋ akbei. ¹⁵Hain akmâ âmâ dosa bâlâk akto han kau manbiâ Anutuje nanne baratne yektere huraguâp dâm yengondo luâk âmbâle bâleŋe gulip manbiâ bâlimap yâk yengât hândâk hutñân diâ hinare akmâ pagaleyekmai. ¹⁶Pagalem kinmâ manmangât den are paŋâk mem manbei. Hain akmâ makbiâ âmâ Kristoje lâuwâŋe miawakmâ âmâ nâŋe tân yenguman aregât nekto huraguwiap. Hain akto nâ heroje akbian. Akto hinje hâk hilâlâm nâŋgâm âmâ âi bo mem hâumgoân amâ Kristoje ekto huraguwiapgât heroje aktân. ¹⁷Akto yeje Anutugât sumbe katberâm nâŋganmâ ulilanmai aregât ye tân yenguwipgât Anutuje makto mombian amâ Anutugât sumbe akbian. Are amâ hanâk aregât heroje akmâ ye olop okot âlep nâŋgâm han biwi konok akbaen. ¹⁸Akto yeje hainâk heroje akniŋbai âmâ nen hainâk heroje nâŋgâ aŋgiwaen.

Timoteogât den.

¹⁹Galalupne, den siâ amâ hin makbe. Humo Yesuje nâŋgâm âlepje dâmbo âmâ galane siâ Timoteo are huŋgun aŋdere yengâlân togowiap. Togom yengât pat ekmâ nâŋgâm purik katmâ nâŋgâlân togo makniŋdo nâŋgâm biwine âlepje akbiap. Aregât dowâk huŋgun aŋbian. ²⁰Akto Timoteogât hin makbe. Luâk siâŋe yengât nâŋgâm han kau olowâk tân yengumap dop hinare siâ bo tatniŋdâp. ²¹Amâ luâk bikñande yejaelâk nâŋgâm âmâ Yesu Kristogât ukenje bo nâŋgâmai. ²²Akto Timoteogât keiŋe nâŋgâmai are. Nanñande eweje tângomap dop hainâk Timoteoje nâ den pat âlepjaet âi tân nugumap. ²³Yâk âlepje akmap gârâmâ aregât gain gain miawakniŋbiap âmâ are nâŋgâm hengemgowianân âmâ huŋgun aŋdere togowiap. ²⁴Akto areâk bo. Humoje nâŋgâ niŋdo nunak gai yengâlân dowâk togowian. Hain nâŋgân.

Epapodito kundat agepgât den.

²⁵Akto den siâ hin. Yeje yengâlân gâtje Epapodito are huŋgun aŋbiâ togo tân nuguap aregât makbe. Aregât hanâk bât tângone akto

tembe loko galane yâk dowâk huŋgun aŋdere yeŋgâlân purik katmâ togowiapgât nâŋgâre ârândâŋ aktâp. ²⁶Yâkŋe nâ umatŋân mandere tân naguep yâkŋe yekbian dâm nâŋgâmbo humo agep. Gârâmâ kundat akto aregât nâŋgâmbiâ umatŋe akto aregât Epapodito yâk okot bâle akmâ umalaŋdâp. ²⁷Amâ kundat momoŋe kondo momberâm agep. Hain akto Anutuŋe okot âlep akmâ tângom heŋgemgoep. Akto yâk konok bo. Epapodito mondo nâŋgâ yâkŋe âmâ kambiamne dondâ bâliwop dâm aregât heŋgemgoep. ²⁸Akto hanâk yeŋe ekmâ biwiyenŋe âlepŋe agâkgât akto nâ nâŋgâm hanokoakmâ manbomgât yâk bo gangerâm hinŋeâk huŋgun aŋdere yeŋgâlân togowiap. ²⁹Togombo aregât okot âlep nâŋgâ aŋmâ Humogât akmâ gala aganbei. Akto yeŋe luâk hainare tângom nâŋganbiâ humo akbiâp. ³⁰Amâ hingât. Yâkŋe yeŋgât lau lokom âmâ ye tân nuguyigât dâp bo tatyenŋiepgât akmâ tân nugum Kristogât âi hâk hilâlâm olowâk mem âmâ momberâm agep.

Propete hianŋi luâkŋe Pilipi yeŋgâlân ariyi.

3 ¹Galalupne, Bâin. Den siâ makbe. Humogât akmâ okot âlep olop heronŋe maronŋe manbei. Ulikŋân kulemoŋan are lâuwânŋe kulemgom nâŋgâre amâ bo umatŋe aktâp. Dâ lâuwânŋe kulemoŋan irekŋe âmâ ye kârikŋe ketuguyektâp.

²Amâ hin, hianŋi luâkŋe yeŋgâlân togoâi. Yâk âmâ hâkyenŋe gâi gâigât ukenŋe nâŋgâmai. Akto agak meme bâlenŋe akmai. Luâk hainare âmâ heyenŋimai. Akto pugaiyanŋe bau me wan me wan kawutyekmai amâ luâk arekŋe dop hainare akmâ kâwutyekberâm togomai. Aregât yeŋaet damun aganŋim manbei. ³Dâ nen âmâ Anutugât kâmot. Nen Anutugât Heakŋande tân nengumbo âmâ Anutugât kotŋe mem agatenŋe huraguwiâp. Akto Yesu Kristonŋe heŋgem nenguep aregât nâŋgâm heronŋe akmâ manbaen. Akto hâkgât wan me wan aregâlâk biwinenŋe bo katmâ âmâ arekŋe tân nenguâkgât ukenŋe bo nâŋgâwaen. ⁴Akto hâkgât wan me wanŋe tân nengumbo huragumap dâine nâ hâkgât siâ siâ dondâ tatniŋmap aregât nâŋgâre humo akbop. Dâ hianŋi luâk hâk gâi gâigât ukenŋe nâŋgâmai are amâ hâkgât siâ siâ tatyenŋimap are nâŋgât hâkgât hârok arekŋe ewanŋiyekbop. ⁵Aregât nâŋgât hâkgât amâ hin maktere nâŋgâŋet. Nâ Israe gâtŋe, Bensamiŋ yâkgât kâmolân gâtŋe miawakmâ yendere hilâm 8 akto hâknân kulem gâinegi. Hebraio nengât agak meme nâŋgâre âgâminep. Akto den kârikŋaet meme akmâ parisaio malân. ⁶Kârikŋenaet akmâ Yesugât kâmot yeŋgât gasa agân. Akto den kârikŋe are lokore siâŋe nekto huraguminep.

Paulonŋe Kembangât akmâ kotŋe siâ siâ hârok hamianŋep.

⁷Akto yu kulemoŋan iregât âmâ ulikŋân nâŋgâre humo agep. Dâ hinŋe âmâ ektere yânŋe aktâp. Hinŋe amâ Kristogât akmâ nâŋgâre wan me

wan are hârok âmâ yânje akmap. Akto aregât ukenje bonângân. ⁸Nâ Humone Yesu Kristo yâkgât keiŋe ekmâ nângâre humo akmap. Aregât hângât siâ siâgât nângâre humo akminep are hinje nângâre yânje aktâp. Akto nâ Kristogât akberâm yâkgât pat akmâ siâ siâ hârok ekmâ gagap dâm hepunmâ meteân. ⁹Akto nâ Moseŋe kulengoep are lokom dosa bâlâk manbiandân amâ hinje hepulân. Akto nâ Kristogâlân dewatim nângâ aŋdere aregât Anutuŋe nekto ârândân akbiap aregât ukenje nângân. Akto nângâ nângâne are Anutuŋe ekto ârândân akbiapgât dop bo tatniŋdâp aregât nângâ nângânaet nângâre giep. ¹⁰Gârâmâ hingât nângâre humo aktâp. Momoŋânba agatbiangât nâ Kristo biwinande nângâ aŋdere Kristo momoŋânba agalep arekŋe wâtŋe niŋdo yâk hâk hilâlâm nângâm moep ¹¹are dop hainâk akmâ nângâm yâkgâlân dewatim momoŋânba agatbiangât nângâm bo mesokbian are nângâre humo akbiap.

Pauloŋe kârikŋe akmâ horalân pirâm ariep.

¹²Galama, yu kulengoân imâ emelâk hârok mendere huraguâp dâm aregât bo maktân. Bo. Yesu Kristoŋe menegepgât agak meme âlepŋe mem miawak niŋâkdâm âi kârikŋe mem manmâ gan. ¹³Akto agak meme âlepŋe are miawakniŋbiap are pânân boâk meaktân. Aregât hin konok akman. Nâ nunaet nângâre hain bo aktâp. Dâ siâ me siâ hepulân are hamianŋman. Akto wan me wan meân are ektere yânje aktâp. Dâ agak memene âlepŋe huragumap are hârokgât ukenje nângâm are miawakniŋâk dâm âi humo meman. ¹⁴Akto Anutuŋe Yesu Kristogât akmâ himbingât pat oloŋ nekmâ hâuŋe âlepŋe katniŋep are mem miawakberâm dewunnande tâŋâk ekmâ âi humo mem pirâm kaut oreman.

¹⁵Nâ hain akman aregât kaulem humo agion nen hârokŋe aregâlâk kârigem nângâm maniâm. Dâ siâ me siâ siâgât nângâmbiâ dâpŋe siâ akbiawân âmâ âlepŋe Anutuŋe hanyeŋe mem pagalembo âlepŋe nângâm kotgâwai. ¹⁶Akto nen hârok hin aktenŋe huragumap. Nen keiŋân agak meme âlepŋe are hârok emelâk mendenŋe ârândân agep are hârok miawagâkgât agak meme âlepŋe hainâk mem metewaen.

¹⁷Galalupne, ulikŋân akyengire nekmâ hainâk watnekbei. Akto luâk bikŋande nen manmaen dop hainâk manmâ akyengimai are ekmâ nângâm heŋgemgowe. ¹⁸Dâ luâk bikŋande Kristo lâwinân moep aregât den mem ge katberâm akmai are hain bo akbei. Yâk yeŋgât keiyeŋe emelâk makyengim mandân. Imâ indem kambiamne bâliâpgât lâuwâŋe makyengiwe. Yâk âmâ Yesu lâwinân moep aregât den pat âlepŋe gasa agaŋmai. ¹⁹Akto luâk âmbâle hainare âmâ hâmbâi hâuŋe bâleŋe umatŋe miawakyengimbo itin gulam akbai. Dâ hinje âmâ sotgât akmâ aregâlâk nângâmbiâ humo akmap. Akto siâ me siâ aŋunŋe olowâk aregâlâk nângâm heroŋe maroŋe manmai. Akto

hângât kotje siâ siâ han nângâ nângâ yeņande lâwindâk mem metemai. ²⁰Dâ nen âmâ hain bo akbaen. Nengât kepia bunje amâ himbimân tatâp. Ainba Humonenje Yesu Kristoje heņgem nenguwiap Humo arekje lâuwâņe gewiap yâkgât lâmgom manmaen. ²¹Hain mandenje miawakmâ luâk siâ me siâ hârok mem ge katyekmâ ikiye amukņân hâwuruyekbiapgât kârikje yeandâp. Kârikje arekje hâknenje mem manmaen ire mem purik kato ikiye hâkne hainare pagalenje olowâk miawakbaen.

Pauloje galalupne biwi konok kinmâ heroje akņetgât magep.

4 ¹Galalupne, biwinande yeņgât dondâ nâņgâmâk aktâp. Ye âmâ nâņgât egâlianlupne aregât wan kulengoân are watmâ âmâ benje Kemu olop manmâ kârigem heņgemgowai.

²Akto yeņgâlân gâtņe âmbâi lâuwâ kotyetņe Euodia akto Sintike yet kuk akmandat are yetgât hin makyetkire nâņgâet. Humogât akmâ biwi konok akmâ manbiandat. ³Akto yeņgât damun siâ tânnugumat gâ hin makņiņdere nâņgâ. Gâņe âmbâi lâuwâ yetkondân are tân yetkumenâ biwi konok akmâ âlepņe manbiandat. Akto areâk bo. Luâk siâ kotje Kelemento akto gala bikje yâkņe pat âlepņet âi aregât tân nuguyi are yeņgât kotyene amâ manman kârikņet kulem esenņân kulengoep aregât tân nenguyiat aregât tânyetkuwen.

⁴Galalupne, ye hârok yeņgât hin makbe. Ye Humogât akmâ biwi kambiamyene heroje akmâ manbei. Aregât lâuwâņe makbe. Humonenņande wan me wan akmap aregât nâņgâm âmâ biwi kambiamyene heroje manbei. ⁵Akto Humonenje ewumâk akņengiâpgât luâk hârok yeukņe lumbe akyeņgimbiâ nâņgâwai. ⁶Akto wan me wangât nâņgâm âmâ horat gorat me hanokoak bo akbei. Bo. Hin akbei. Hokboâk hokboâk hingât me haingât akmâ Anutu mepaimņe mem ulilanmâ makmâ manbei. ⁷Hain akbiâ aregât Anutuņe memene akyeņgimbo biwiyeņe sândugewiap are luâk nen ewanginenekmapņe han nâņgâ nâņgâyeņe Kristo Yesugâlân mendugum kondangombo yem kârigewiâp.

⁸Akto galama den bâiņe ire makbe. Wan me wan bunje me wan me wan siâ âlepņe agakņe olop are nâņgâmbiâ humo akto aregâlâk nâņgâm manbei. Akto wan me wan siâ luâk âmbâleņe nâņgâmbiâ âlepņe akmap me Anutuņe ekto ârândâņ akmap me wan me wan bâleņe bo aregâlâk nâņgâm manbei. Akto wan me wan ekmâ Anutu mepai aņmâ heroje akmai are hârok nâņgâm manbei. ⁹Akto nâ wan me wan akmâ meân a hainâk akmâ manbei. Akto siâ siâ makmâ ligim yeņgire nâņgâyi a hainâk akmâ manbei âmâ Anutu lumbe amboņande ye olop mando biwiyeņe sândugewiâp.

Pilipi gâtņande Paulo tângombiâ Pauloje Anutu mepaimņe miep.

¹⁰Galalupne, ulikņân wan me wan akņiņberâm dâpgât kulâgâtâmâ hâumgoyi. Hâumgombiâ umatņe miawagep. Dâ hinņe dâp miawak

yengimbo kambiam owâinjân tân nugum puli katbiâ togoep. Togombo okot âlep humo nângân. ¹¹Akto puligât me siâ siâgât umburuk akmâ bo kulâgâtmâ manman, akto niņjetgât bo makyenġiân. Akto siâ siâgât bo egâlijanman. Nâ wan me wan siâ tatniņdâp me umburuk mandân aregât kambiamne bo bâlimap. ¹²Nâ mesak gosak umburuk mandân me wan me wan undup yeniņdâp amâ âlepne mandân. Nem tepne pikto manman me mop manman aregât keiņe hârok nângâm meteân aregât hin me hain siâ me siâ miawakniņdo âmâ âlepne manman. ¹³Aregât keiņe hin. Kârikne niņmapne yâkne tân nugumbo âmâ wan me wan hârok akmâ meteman.

¹⁴Dâ yeņe âmâ kambiam bâliân mandere tân nugum heņgem nuguyi aregât nângâre huraguâp. ¹⁵Akto ye emelâk nângâi. Nâ den pat âlepne mem yeņgât hân humo kotne Makedonia ain togoân. Ain pup pup togom âmâ makyenġire nângâm metemiâ âmâ hepunyeġân. Hepunmâ hân siângen ain mandere Yesugât kâmot siâ siâ bo tân nuguyi. Pilipi gâtne yeņe konok amâ tân nuguyi. ¹⁶Akto ye hepun yekmâ Tesalonike kepian mandere hâkgât siâ siâne tân nuguâkgât katbiâ togoep. ¹⁷Akto nâ ito me puligât bo egâlijanân. Bo. Yeņe tân nugumiâ aregât Anutuņe hâuņe âlepne akyenġimbo manman âlepņân manjetgât nângâman. ¹⁸Akto wan me wangât ulikņân undâgâtmâ mandere Epapoditoņe yeņgâlânba mem togo niņdo âlepne mandân. Akto yeņe nâ wan me wan niņi aregât nângâre benne Anutuņe âkâ nângâmbo sumbe âlepne higenne olowâk heroņe akmâ âgâmbo nângâmmap dop hainâk aktâp. ¹⁹Akto yeņe tân nuguyi aregât hin nângân. Anutu damunne akmap yâkne Yesu Kristogât nângâm akyenġiwiap. Akto wan me wan akyenġiwiap amâ yânne bo. Pagalenġânba Yesu Kristogât akmâ wan me wangât yeņe umburukne akbai are ârândân akyenġiwiap. ²⁰Akto Anutu Ewenenne yâkgâlâk âmâ kotne mem agatmâ heroņe maroņe akmâ âgâwaen. A bundâk.

Den bâiņe.

²¹Galalupne, nângât den bo aktâpgât nâņe Yesu Kristogât kâmot yeņgâlân manmai are yeņgât nângân are makyenġiwei. Akto galalupne Yesugât kâmot nâ olop mandâi yâkne hainâk yeņgât nângâ yeņgiâi. ²²Akto in âmâ Roma luâk Sisa yâkgât hoņ bawalupne yeņgâlân gâtne bikne biwiyeņe Yesugâlân kali yâkne gai nângâyenġiâi.

²³Akto Humonenne Yesu Kristoņe damunyeņe akto biwiyeņe sândugeâkgât ulilaņdân.